

L'app cuntegna ussa era verbs sursilvans

Dapi la gievgia stat a disposiziun ina nova versiun da l'app «Dicziunari Rumantsch». Ella è vegnida installada passa 15 000 giadas durant l'ultim onn. Perquai han ils realisaturs actualisà l'applicaziun ed accumplì differents giavischs dad utilisadoras ed utilisaders.


L'app «Dicziunari Rumantsch» unescha sis differents dicziunaris cun passa in mez milion endataziuns en ina app. Ella cuntegna dicziunaris da tut ils tschintg idioms sursilvan, sutsilvan, surmiran, vallader e puter sco era dal rumantsch grischun. Perquai che las datas vegnan tuttas telechargiadas cun l'installaziun sin il telefonin, respectivamain sin il tablet, funcziunescha l'app pli tard era senza connexiun cun l'internet.

La nova versiun cuntegna ussa era verbs sursilvans. Las datas derivan da las glistas da verbs cumpiladas dad *Emanuel Brühlmann*, *Arne Polage* e da la Lia Rumantscha. Fin ussa stevan quellas mo a disposiziun en furma da dus PDFs sin la pagina d'internet da la Lia Rumantscha. Ulteriuras novaziuns èn ina funcziun da parter pleds che plaschan, optimaziuns da la funcziun da tschertga e l'opziun da tschertgar era furmas conjugadas da verbs.

Datas uffizialas

Las ulteriuras datas linguisticas derivan dals dicziunaris uffizials che vegnan era duvrads en l'instrucziun. Ils dicziunaris dals idioms surmiran e sutsilvan sco era dal rumantsch grischun derivan da pledarigrond.ch, las datas sursilvanas da vocabularisursilvan.ch e quellas dal vallader e dal puter sa basan sin ils dicziunaris da «Meds d'instrucziun dal Grischun».

L'interfatscha d'utilisader simpla e surveibla stat a disposiziun en tudestg e rumantsch. Ella possibilitescha da midar svelt tranter ils differents modus da tschertgar ed ils idioms. Ella porscha plinavant la pussaivladad da memorisar singuls resultats en ina glista da favorits. La funcziun è adattada per



L'app «Dicziunari Rumantsch» è vegnida adattada.

FOTO MAD

memorisar pleds ch'ins ha già tschertgà pliras giadas. Il project è vegnì realisà da *Gion-Andri Cantieni* (programmaziun), *David Bühler* (design) e *Martin Cantieni* (mainaproject) sco software open source. La lavur concepiunala ha l'entir team prestà.

Sin dicziunari.ch chattan ins ulteriuras infurmaziuns e links a l'app. La Lia Rumantscha, l'uniun Pro Sagogn e la Surselva Romontscha han sostegnì finanzialmain il svilup da la nova versiun da l'app. (cdm/fmr)